

欽定詩義折中

御纂詩義折中卷之三

邶一之三

邶國名武王克商分自紂城朝歌以北謂之邶
南謂之鄘東謂之衛邶不詳其始封其後并入
於衛故邶風皆衛事也邶雖入衛而王朝之籍
猶有邶在故太史採風其得之邶地者仍謂之
邶孔子因之者不予衛之得滅邶也魏滅於晉
仍存魏風亦猶是也

汎彼柏舟亦汎其流耿耿不寐如有隱憂微我無酒

以敖以遊

比而賦也汎猶泛也微猶非也衛君棄君子而用
小人故君子憂之而賦此詩也嚴粲曰舟必有人
以維楫之而後有所濟今柏舟雖堅而無人維楫
亦泛其流而已將何所泊乎以喻國無賢人將日
敗壞而無所止也李樗曰仁人之所憂者國也此
不可以酒解亦非敖遊之所能釋也

我心匪鑒不可以茹亦有兄弟不可以據薄言往愬
逢彼之怒

賦也鑒鏡茹度據依愬告也言鑒能度物而我心
匪鑒故入之情僞不能預照兄弟至親宜可憑依
而不度其不可是以往愬我之憂而反逢彼之怒
也鄭康成曰責以兄弟之道謂同姓臣也

我心匪石不可轉也我心匪席不可卷也威儀棣棣
不可選也

賦也棣棣閑習之貌選擇也言兄弟之怒我者蓋
謂我孤介自守必行其志而不能貶道以隨時也
然我自度之矣石猶可轉而我心匪石則自守者

不可易也席猶可卷而我心匪席則必行者不可
屈也欲自貶損而威儀棣棣無可擇而改者則終
不能隳方以爲圓也

憂心悄悄愠于羣小覲閔旣多受侮不少靜言思之
寤辟有標

賦也悄悄憂貌羣小衆小人之在君側者覲見閔
病辟拊心也標重拊之也不貶道以隨時則國事
愈可憂矣必自守以行志則小人愈愠怒矣羣小
皆愠則所以中傷而凌辱之者無所不至矣故覲

閔而又受侮也既多不少言小人之衆也

日居月諸胡迭而微心之憂矣如匪澣衣靜言思之不能奮飛

比而賦也居諸語辭迭更微暗也日喻君月喻臣君暗則無以察其臣而臣亦暗臣暗則無以輔其君而君愈暗是君臣更迭而暗如日月之更迭而微故中心隱憂如衣垢而不澣也如是則可以去矣顧以地處親賢心憂宗國雖時不可爲而終欲委曲以圖濟不能愬然而奮飛也朱子曰五倫之

際皆當以此爲法屈原不忍其憤懷沙赴水此賢者之過也賈誼曰厯九州而相其君兮何必懷此都也又失之遠矣

柏舟五章章六句

詩序曰柏舟仁而不遇也夫以柏舟之仁人心不轉而儀不選亦可以見信於君矣而終不遇者以君不明而小人蔽之也君之不明非必闇且弱也往往聰明才武之主一念嗜好有所不謹爲小人所迎合遂不覺而用之

小人既用迎合愈巧而君子猶不轉而不卷
是以君心愈疏而小人皆愠日思所以病侮
之而國遂不可爲矣正風之變皆由於此也
綠兮衣兮綠衣黃裏心之憂矣曷維其已

比也綠間色黃正色也間色而乃以爲衣正色而
反以爲裏以比嬖妾蒙寵而顯夫人見疏而微故
心憂之而不能止也

綠兮衣兮綠衣黃裳心之憂矣曷維其亡

比也上曰衣下曰裳亡忘也嚴粲曰黃裏掩蔽而

已黃裳則失位矣謝枋得曰嫡妾易位則家不齊而國不治故爲君憂爲君之子憂而非爲一身也
綠兮絲兮女所治兮我思古人俾無說兮

比也說過也言綠本絲也而今爲衣者由治絲之女染織而成以喻妾本微賤而今蒙嬖寵亦由不能防微杜漸以至於此因思古人當必有善全之道俾君與妾皆歸於無過而傷已之不能也

絺兮綌兮淒其以風我思古人實獲我心

比也淒寒也絺綌質薄故寒風入之程子曰絺綌

所以來風是也以喻己之被掩失位亦德有未周
故生讒間因思古人厚積其德而頑讒胥化先得
我心之同然當則而效之也

綠衣四章章四句

詩序曰綠衣衛莊姜傷己也莊公惑於嬖妾
莊姜賢而失位乃莊姜不怨公與妾也而自
傷之綠絲女治傷己之才疎而有以致之也
絺綌以風傷己之德薄而無以處之也可謂
忠厚之至矣抑人之賢否其辨甚明而或至

於倒置者其好惡僻也不好窈窕斯貞女見
棄綠衣之夫人所以被掩於嬖妾也不惡讒
諛斯直臣見疏柏舟之仁人所以受侮於羣
小也然則人君之好惡可不慎哉

燕燕于飛差池其羽之子于歸遠送于野瞻望弗及
泣涕如雨

興也燕燕雙燕也差池分飛也歸大歸也雙燕同
飛而羽忽差池以興二人同處而一人遠別也之
子謂戴嬀也莊姜無子以戴嬀之子完爲子莊公

卒完卽位嬖人之子州吁弑之故戴嬀大歸於陳
而莊姜送之也婦人之禮迎送不出門而遠送于
野者有所謀也

燕燕于飛頡之頡之之子于歸遠于將之瞻望弗及
佇立以泣

興也上飛曰頡下飛曰頡將送也以燕之上下相
逐興人之彼此相送也佇立以泣者行人已遠猶
不忍歸故久立以望之也

燕燕于飛下上其音之子于歸遠送于南瞻望弗及

實勞我心

興也以燕之上下而音漸遠興人之遠別而信難
通也送於南者陳在衛南也泣涕如雨行且泣也
佇立以泣止行也實勞我心止泣也不泣而勞心
者所謀之事未知濟否故心憂之不止傷別也

仲氏任只其心塞淵終溫且惠淑慎其身先君之思
以勸寡人

賦也仲氏字也戴嬀乃厲嬀之姊故曰仲氏也能
承大事曰任春秋隱公四年二月衛州吁弑其君

完九月衛人殺州吁于濮濮陳地也史記曰州吁弑桓公自立欲伐鄭石碯因桓公之母家於陳詐爲善州吁至鄭郊石碯與陳侯謀因殺州吁于濮由此觀之戴嬀之歸陳乃石碯用陳侯以討賊之因也然則仲氏之所任可知矣莊姜之遠送于野其故亦可想矣仲氏任此大事而莊姜知其有濟者以其心誠實而淵深其身和順而謹飭又能思先君之恩則其必討嗣君之賊可知也此固仲氏之能任而莊姜亦可謂知人善任矣

燕燕四章章六句

詩序曰燕燕衛莊姜送歸妾也州吁弑立衛
人脅從而莊姜戴嬀乃能內用謀臣外結與
國討賊定亂其功可謂奇矣究其所以成功
未始不本於正也任天下之事不惟其才惟
其德德具於身心非塞無以立本非淵無以
沉幾非溫無以和衆非惠無以循理非淑無
以慮善非慎無以集成有此六者又加之以
忠愛則德全矣以此定難何難不濟以此圖

功何功不成然則人之所以任事與夫擇人而任以事者讀燕燕之卒章亦可以得其大凡矣

日居月諸照臨下土乃如之人兮逝不古處胡能有定寧不我顧

賦也之人謂州吁也古常也不古處不以常道相處也定止其亂也州吁弑桓公將不利於莊姜故莊姜憂之也言日月之明照臨下土而此人乃不以道相處是亂未已也何時而能有定乎豈日月

之照臨獨遺我而不顧乎何爲至今不定也

日居月諸下土是冒乃如之人兮逝不相好胡能有
定寧不我報

賦也不相好欲相害也報善惡之應也言日月之
恩丕冒下土而此人乃欲相害則亂已迫也何時
而能有定乎豈日月之丕冒而我獨不獲爲善之
報乎何爲宜定而久不定也

日居月諸出自東方乃如之人兮德音無良胡能有
定俾也可忘